

NUBENAN SÅNTA MARIAN KÅMALEN



MATUNA I GINASGÅS-MU

Matuna i ginasgås-mu, Maria, Bithen yan Nâna.
Sa' nina'magof i Saina, nu i gef fina'tinâs-mu.
Hu tungo' i mina'gås-mu ya hu sen nâ'i hao pâ'go,
I anti, i minalago', yan todû i guinahâ-hu.
Yanggen hâgu para guâhu, guâhu, Nâna, para hâgu.
Yanggen hâgu para guâhu, guâhu, Nâna, para hâgu.

I SIÑÂT I SANTOS KILU'OS

Put i siñât i Santos Kilu'os na fanlibre ham gi inimigon-mâmi, Yu'os Sainan-mâmi. Gi na'an i Tata, yan i Lahi-ña, yan i Espiritu Sânto. Taiguennao mohon.

FINA'TINAS SINETSOT

Âsaina Jesukristo, Rai na taiche' i mina'gås-mu, yan Yu'os na táihinekkok minaolek-mu, mina'lak i Tata yan ininan i ginatbo-ña, i mina'huyong todû i guaha. Hues, i mina'fanlibre i taotao siha, taiche'tan na Kinilu! Na Un sen guaiya i ginasgas, na Un na'suha gi isao ayu i inayek-mu na nanâ-mu. Ma'estro nu i hu hongge, kalan i ti lálachi na minagâhet. Satbadót, annai mannánangga yu' kalan ti hi'hikkok na mina'âse'. Yu'os nu i hu gofli'e' kalan i sen takhelo' na minaolek nu i sen gofli'i'on!

Guahu, lâlaolao yu' yanggen hu atitutuyi na hu atotga yu' umisague hao. Hu tungo' i táilayen fina'tinâs-hu, ya piniti yu' nu i hu isague hao. CHa'-mu chumâchanda, Âsaina, ini i mañotsot na i'isao nu i lumiheng gi papa' i manton ayu i gâsgas na Bithen. Nâ'i ennao i mandidok yan manle'an fanatan-mu ti manmañodda' nu i dídide' na isao.

Ayu i sen guaguan na hâga' nu i Un chuda' gi kilu'os annai Un sâgue' ham, ya Un na'suha i sen sântos na nanâ-mu gi ginedden i isao, na'ma'asi' i yu' minaolek-ku. Na'gâsgas nu ayu ha' i na'ma'ase' na anti-hu nu i minitong i isao, ya hu siña lumi'e' i iná'paka ennao i Un gofli'e' na Paluma. Ya guâhu, metton i hinasso-ku. Ya hu nâ'i hao finiho' nu i hinilat i kurason-hu na piniti, na ti hu isâgui hao ta'lo yanggen Un na'inayuda yu' nu i yini'usan na grasia-mu. Taiguennao mohon.

MATÁYUYOT I ESPÍRITU SÂNTO

Naná magof na Espiritu na ginen i Tata yan i Lahi-ña kalan taiche' na umaguaiyan-ñiha! Ina i hinasso-ku, songge i hinalom-hu, ya hu géftuna yan hu na tákhelo' i sen mǎ'gas na ássaguâ-mu, nanan Saina-hu as Jesukristo, si Sânta Maria, hu nubinánayi yan hu háhasso i mestérion i tá'isao na mama'potge ñaihon-ña. Taiguennao mohon.

MATÁYUYOT SI SÂNTA MARIA

Sen gâsgas hao, Bithen Maria, na hâgu ha' na maisa i guinaiya na hâgan Yu'os Tata, sen nânan i Lahi-ña, sen mǎ'gas na asaguan i Espiritu Sânto, lálala' na sâgan i Sinantusan Trinidát. Mandádanña' ham gi me'nâ-mu ya in na'etnon i kurason-mâmi yan i kurason-mu.

In tikúkkuni i dinángkolon Mina'gås-ña. In sásangan i taiche' na Sinantos-ña, in nâ'i gui' nu i ginefli'en-mâmi. Ya i táddodong na respetu in títina gui' sa' nina'libre hao gi fine'nena na isao. Ya nina'bula hao grâsia ayu annai mama'potge ñaihon hao. Manmalago' ham in gepte hao sen mǎ'gas; ya in gágagao hao na un na'taka' ham nu i magâhet na ginefli'en Yu'os yan ayu i sen sântos na pento'-ña. Taiguennao mohon.

TINAITAI GI FINE'NENA NA HA'ANI

Sen gâsgas hao, Bithen Maria, sen nânan Yu'os, nu i mama'potge'ñaihon tái'isao. Bula grâsia, inekte nu i tininas yan i fine'nena na tinái'isao. Sen masâmai yan taiche'tan na un miresi numanan Yu'os. Hâgu, Ásaina, gi mama'potge'ñaihon-mu, ayu i gósmanana na machâkchak i hassuyon na ha'ânen i grâsia. Yan i matuna na sinhilo' i atdao i tininas, nu i dumúdulalak i hinemhom i isao, ya chumo'chomma' i ánineng i finatai. Ya ha bábababa i fanhakman i langet.

Manmámagof ham, Ásaina, nu i tinakhelo'-mu. In gégepte pâ'go na ha'âni. In tekukkuni i sen gâsgas na mama'potge'ñaihon-mu. In sâsangan, na hâgu, sen masâmai yan tái'isao. Manmámagof ham, ya in títina lokkue' i sen sântos na mañaina-mu as Joaquin yan Ana. Ya in na'tátakhelo' i Sinantusan Trinidadát, sa' sen nina'gâtbo hao guihi na ha'âni. In gágagao hao, na nâna, nu i ginassgas i anten-mâmi yan i minaolek i penngan-mâmi pa'go, yanggen ha' mañásaga ham gi tano', yan i finatai-mâmi. Taíguennao mohon.

TINAITAI GI MINA'DOS NA HA'ANI

Sen gâsgas hao, Bithen Maria, rainan i manânghet siha, na mama'potge'ñaihon ma'okte grâsia yan mana'takhelo'ña ki i sérafin siha. Ya kalan gualâfon na pulan, bula minaolek. Na maná' i hao nu i manana para un atan ha' si Yu'os yan i hinengge. Ya guennao na grâsia takhelo'ña hao ki i manákhelo' na sérafin siha, sa' kabalesña i hinengge-mu ki i hinenggen-ñiha; sa' achok ha' mamaigo' hao, makmâmata ha' i kurason-mu.

Manmámagof ham, Ásaina, nu i tinakhelo'-mu. In gégepte pâ'go na ha'âni. In títina i taiche'tan na mama'potge'ñaihon-mu. Manmámagof ham, ya in títina lokkue', i sen sântos na mañaina-mu as Joaquin yan Ana. In na'tátakhelo' i Sinantusan Trinidadát, sa' sen nina'gâtbo hao guihi na ha'âni. In gágagao hao, na un hagu' i ham nu i fehmanan na hinengge, nu i inatan si Yu'os guini gi tano ya in li'e' gi langet. Taíguennao mohon.

TINAITAI GI MINA'TRES NA HA'ANI

Sen gâsgas hao, Bithen Maria, rainan i patriátka siha, nu i mama'potge'ñaihon tái'isao. In adotna nu i bittot mannangga, nu i un tâtanga nâya na u gaige ha' si Yu'os giya hâgu. Na ginen ayu ha' annai un tutuhon hao huma'âni gagaige hao giya guiya put grâsia. Ya sa' guâha giya hâgu ennao na ninangga, un miresi na u guse' mângi gi tano' yan i minetton i gineggue-mu nu hami. Manmámagof ham, Ásaina, nu i tinakhelo'-mu. In gegepte pâ'go na ha'âni i mama'potge'ñaihon-mu. In sasangan na hâgu sen gâtbo hao yan tái'isao.

Manmámagof ham, ya in títina lokkue' i sen sântos na mañaina-mu as Joaquin yan Ana. In na'tátakhelo' i Sinantusan Trinidadát, sa' sen nina'gâtbo hao guihi na ha'âni. In gágagao hao, na nâna, ninangga, ya in angongokko i ilek-ña si Yu'os na u na' i ham, iyon-mâmi gi langet. Taíguennao mohon.

TINAITAI GI MINA'KUATTRO NA HA'ANI

Sen gâsgas hao, Bithen Maria, rainan i prufeta siha, nu i mama'potge'ñaihon tái'isao. In adotna nu i manmaolek na pennga' siha. Na linesgue hao nu i ginefli'en Yu'os, na ayu ha' annai un tutuhon huma'âni, ha na'chilong i kurason-mu yan i kurason Yu'os. Ya nina'ma'lakña hao ki yan mandanña i mansérafin yan i mañântos gi langet.

Manmámagof ham, Ásaina, nu i tinakhelo'-mu. In gégepte pa'go na ha'áni yan in tikukkuni i taiche'tan na mama'potge'ñaihon-mu. In sásangan na hãgu sen gâtbo hao yan tái'isao. Manmámagof ham ya in títina lokkue' i sen sântos na mañaina-mu as Joaquín yan Ana. In na'tátakhelo' i Sinantusan Trinidad, sa' sen nina' gâtbo hao guihi na ha'áni.

In gágagao hao, na nãna yan nanan i Yini'usan Ginefli'e' na un na'nina'yi i kurason-mãmi nu ennao na ginefli'e'. Ya u fansenengge nu ennao na guâfen lãnget guini gi tano'. U fanmaññila' ha' gi langet gi manáihinekkok na ha'áni. Taíguennao mohon.

TINAITAI GI MINA'SINGKO NA HA'ÁNI

Sen gãsgas hao, Bithen Maria, rainan i apóstoles siha, nu i mama'potge'ñaihon tái'isao. In adotna nu todú i manmaolek na pennga' ya kululo'ña nu i Tinemtom. Ya un siña fuma'tinas i palu siha na bittut yan i dinanche na gine'hen i Santa Ekglesia. In sásangan hao, Ásaina, na sen tomtom hao na Bithen gi mesteriún Nãnan Yu'os ha' yan i Sãnta Ekglesia yan sainan todú siha i nina'huyong Yu'os.

Manmámagof ham, Ásaina, nu i tinakhelo'-mu. In gégepte pa'go na ha'áni yan in tikukkuni i taiche'tan na mama'potge'ñaihon-mu. In sasangan na hãgu sen gâtbo hao yan tái'isao. Manmámagof ham ya in títina lokkue' i sen sântos na mañaina-mu as Joaquín yan Ana. In na'tátakhelo' i Sinantusan Trinidad. Ya in gágagao hao na un fãkkai ham nu i Tinemtom. Ya in na'tunas i pinekkat-mãmi taimanu i malago' Yu'os. Taíguennao mohon.

TINAITAI GI MINA'SAIS NA HA'ÁNI

Sen gãsgas hao, Bithen Maria, ma'lak na rainan i manmãttet siha, nu i mama'potge'ñaihon tái'isao. In adotna nu todú i manmaolek na pennga' na manggága chong ha' yan i tininas nu i muna' tunas yan muna'kabales i che'cho' siha annai lãla'la' hao guini gi tano'. Na ha guaiyaña si Yu'os ki todú i santos na hinanao i manunas.

Manmámagof ham, Ásaina, nu i tinakhelo'-mu. In gégepte pã'go na ha'áni yan in tikukuni i taiche'tan na mama'potge'ñaihon-mu. In sasangan na hãgu sen gâtbo hao yan tái'isao. Manmámagof ham ya in títina lokkue' i sen sântos na mañaina-mu as Joaquín yan Ana. In na'tátakhelo' i Sinantusan Trinidad, sa' sen nina' gâtbo hao guihi na minagãhet hinengge. In gágagao hao, na nãna, na un na'hago' ham nu i tininas nu i u na'fanunas ham pã'go yan astaki manmãtai ham. Taíguennao mohon.

TINAITAI GI MINA'SIETTE NA HA'ÁNI

Sen gãsgas hao, Bithen Maria, rainan i komfesót siha, nu i mama'potge'ñaihon tái'isao yan gi minaolek i tinaí'isao. In adotna nu todú i bittut siha yan dinidok nu i minatatnga. Ya un siña chumo'gue sen kabãles. Un ã'ñao siha i manganiti. Ya un yamak i ilon i kulepbla nu i dumagi si Eba gi Para'isu. Sa' ennao na takhelo' cho'cho' mina'hagas ha' inayek hao as Yu'os.

Manmámagof ham, Ásaina, nu i tinakhelo'-mu. In gégepte pã'go na ha'áni yan in tikukkuni i taiche'tan na mama'potge'ñaihon-mu. In sasangan na hãgu sen gâtbo hao yan tái'isao. Manmámagof ham ya intítina lokkue' i sen sântos na mañaina-mu as Joaquín yan Ana. In na'tátakhelo' i Sinantusan Trinidad, sa' sen nina' gâtbo hao guihi na ha'áni. In gágagao hao sen gãsgas na Bithen na un fãkkai ham nu i mina'tatngãnga-mu. Ya in fa'tinas taiguihi i fina'tinãs-mu. Ya in ã'ñao i acha'ot-mãmi siha yan i finatai-mãmi. Taíguennao mohon.

TINAITAI GI MINA'OCHU NA HA'ANI

Sen gâsgas hao, Bithen Maria, Rainan i mambithen, nu i mama'potge'ñaihon tái'isao. In adotna nu todú siha i manmaolek na pennga' yan bittut na mana'fañetton gi sen masâmai ni Biniten-mu. Sa' un nânan i linahyan i bithen siha na mansen gâsgas na asaguan i Bithen as Jesukristo i Lahi-mu na sen sântos ya nina'tagâhlo lokkue' i bittút i templânsa.

Manmâmagof ham, Ásaina, nu i tinakhelo'-mu. In gégepte pâ'go na ha'âni yan in tikukkuni i táiche'tan na mama'potge'ñaihon-mu. In sasangan na hâgu sen gâtbo hao yan tái'isao.

Manmâmagof ham ya in títina lokkue' i sen sântos na mañaina-mu as Joaquín yan Ana. In na'tátakhelo' i Sinantusan Trinidad, sa' sen nina'gâtbo hao guihi na ha'âni.

Ya in gágagao hao na un fâkkai ham nu ennao na bittut. Ya cha'-mâmi dumídiles i ma'usan i sentidu siha gi tátaotao. Lao maolekña in sa'pet yan in chemma' siha taiguihi i fina'tinâs-mu. Taíguennao mohón.

TINAITAI GI MINA'NUEBI NA HA'ANI

Sen gâsgas hao, Bithen Maria, rainan i mañântos, nu i mama'potge'ñaihon tái'isao. Ya ma'okteña sinantos ki todú siha yan mandanña' ya maná'gofli'e' yan si Yu'os. Maná'i hao nu i bittot i minesngon nu i sen tagâhlo' na bittút nina'en Yu'os yan i mana'sásahnge ha' gi mama'potge'ñaihon -mu.

Manmâmagof ham, Ásaina, nu i tinakhelo'-mu. In gégepte pâ'go na ha'âni yan in tikukkuni i táiche'tan na mama'potge'ñaihon-mu. In sasangan na hâgu sen gâtbo hao yan tái'isao.

Manmâmagof ham ya in títina lokkue' i sen sântos na mañaina-mu as Joaquín yan Ana. In na'tátakhelo' i Sinantusan Trinidad, sa' sen nina'gâtbo hao guihi na ha'âni.

In gágagao hao na un na'fanmesngon ham ha' gi sen fehman na maguaiyan i tailamen na mama'potge'ñaihon -mu. Ya in gepte hao gi langet. Taíguennao mohón.

TINAITAI I IMAKULÁDA NA KONSEPSIÓN

O Yu'os nu i ginen i Imakuláda na Konsepsión, i Bithen as Santa Maria, un pripâra un dikno na fansagâyan para i Lahi-mu. In gágagao Hao, na put i gi malí'en i para i finatai i Lahi-mu, Un pattang gui' ginen todú nu i mancha. Pues, Hâgu lokkue', Un petmiti ham mana'fanggâsgas ginen i tinayuyot-ña na in fanmâtto guatu giya Hâgu. Ginen i mismo Sainan-mâmi as Jesukristo, i Lahi-mu, nu i lâ'la'la' yan mangubiebietna; yan Hâgu manhâhamyo yan i Espíritu Santo, Un Yu'os para todú i manáihinekkok na tiempo. Taíguennao mohón.

TRES NA NINENI

FINE'NENA NA NINENI

Hu tuna hao, na Kurason Santa Maria, tunâyon na sahguan i sen guinaiya-ku as Jesukristo Yu'os Ostia. Ya magof yu' sa' hu lí'e' hao na nina'bula as Yu'os Tâta nu i grasia siha. Ya nina'hagâ-ña. Ya senggâtbo gi sen gâsgas na mama'potge'ñaihon-mu.

Kânta: Châhlao, nanan-mâmi, i Abe Maria. Paopao na nina'en i taotao-mu siha.

Techa: Si Yu'os un gineggue Maria, bula hao grâsia, Si Yu'os u gaige giya hâgu; u matuna hao entre todû i famalao'an siha ya u matuna i finañâgu-mu as Jesus.

Todu: Santa Maria, Nânan Yu'os, tayuyuti ham nu i maní'isâo pâ'go yan i oran i finatai-mâmi. Âmen.

Techa: U matuna i Tata, yan i Lahi-ña, yan i Espiritu Santo.

Todu: Taiguihi i tutuhon-ña, pâ'go yan siempre gi i manáihinekkok na ha'âni. Taíguennao mohon.

MINA'DOS NA NINENI

Hu tuna hao, na Kurason Santa Maria, tunâyon na sahguan i sen guinaiya-ku as Jesukristo Yu'os Ostia. Ya magof yu' sa' hu li'e' hao na nina'bula as Yu'os Lahi-ña nu i grâsia siha. Ya nina'nanâ-ña. Ya sen gâtbo gi sen gâsgas na mama'potge'ñaihôn-mu.

Kânta: CHâhlao, nanan-mâmi, i Abe Maria. Paopao na nina'en, i taotao-mu siha.

Techa: Si Yu'os un gineggue Maria, bula hao grâsia, si Yu'os u gaige giya hâgu; u matuna hao entre todû i famalao'an ya u matuna i finañâgu-mu as Jesus.

Todu: Santa Maria, Nânan Yu'os, tayuyuti ham nu i maní'isâo pâ'go yan i oran i finatai-mâmi. Âmen.

Techa: U matuna i Tata, yan i Lahi-ña, yan i Espiritu Santo.

Todu: Taiguihi i tutuhon-ña, pâ'go yan siempre gi i manáihinekkok na ha'âni. Taíguennao mohon.

MINA'TRES NA NINENI

Hu tuna hao, na Kurason Santa Maria, tunâyon na sahguan i sen guinaiya-ku as Jesukristo Yu'os Ostia. Ya magof yu' sa' hu li'e' hao na nina'bula as Yu'os Espiritu Santo nu i grâsia siha. Ya fina'asaguâ-ña. Ya sen gâtbo gi sen gâsgas na mama'potge'ñaihôn-mu.

Kânta: CHâhlao, nanan-mâmi, i Abe Maria. Paopao na nina'en, i taotao-mu siha.

Techa: Si Yu'os un gineggue Maria, bula hao grâsia, Si Yu'os u gaige giya hâgu; u matuna hao entre todû i famalao'an ya u matuna i finañâgu-mu as Jesus.

Todu: Santa Maria, Nânan Yu'os, tayuyuti ham nu i maní'isâo pâ'go yan i oran i finatai-mâmi. Âmen.

Techa: U matuna i Tata, yan i Lahi-ña, yan i Espiritu Santo.

Todu: Taiguihi i tutuhon-ña, pâ'go yan siempre gi i manáihinekkok na ha'âni. Taíguennao mohon.

TINAYUYOT

Sen gâsgas hao, Bithen Maria, magâhet na nânan Jesús yan i Sânta Iglesia. Ya gi minagâhet yan mesteriôn i sen gâsgas na mama'potge'ñaihôn-mu patronan ini na tâno'. I sen na' magof na mesteriôn i táiche'tan na mama'potge'ñaihôn-mu minâ' in tatayuyot hao na un atan ham nu i yo'ase' na fanatan-mu. Ya in fana'gofli'e' ham nu i famagu'on-mu nu i ti hihikok na ginefli'e'. In dâdalalak, an ha' manlâla'la' ham, i manmatâgo'-mâmi. Ya un hagu'i ham, nu i in gâgagao hao yan i grasian i u maolek finatai-mâmi. Taíguennao mohon.

Techa: Åbe Maria Purisima, **Todu:** Sin pikâdu konsebida.

KÂNTAN FINAKPO': SEN MASÂMAI HAO, ABOK-HU

Sen masâmai hao, abok-hu, sântos hao gi tutuhon-mu.

Koru: In tina Sânta Maria, i mama'potge'ñaihôn-mu.

Pinto' Yu'os i lahi-ña, mama'taotao yan patgon-mu,
Sa' ha hentan giya hâgu, i binithen hinasso-mu.
Taihineplat, taichine'tan, yan sen gâsgas kurason-mu.

Koru: In tina Sânta Maria, i mama'potge'ñaihôn-mu.

Annai nina'gai ha'âni, as Yu'os i tataotao-mu,
ha ke'âmot i aniti, i sinantos gi ha'of-mu.
Lao mayamak i ilu-ña, gi mama'potge'ñaihôn-mu.

Koru: In tina Sânta Maria, i mama'potge'ñaihôn-mu.

Nina'tungo' hao manana, as Yu'os gi sanhalom-mu.
Na humâhamyo yan guiya, kalan Saina yan abok-mu.
Ayu nai bula hao grâsia, ma'okte i minagof-mu.

Koru: In tina Sânta Maria, i mama'potge'ñaihôn-mu.

Nanan-mâmi as Maria, sâgue' i famagu'on-mu.
Astaki in fanmapo'lo, gi echongñan i tronu-mu.
Ya in tina i Saina-ta, as Jesús gi gina'chong-mu.

Koru: In tina Sânta Maria, i mama'potge'ñaihôn-mu.